

Novas de su Comunu



Atividadis po Su Carnovali 2012 po is pipius de sa scola elementari

De s'amministratzioni comunali de Baressa impari a sa biblioteca e a s'Istituto comprensivu de Abas - scola elementari de Baressa – est istada po **giòbia 09.02.2012** a mengianu unu atòbiu cun Alessandro Cadelano chi at scrittu su libru “Il Risveglio del Re” – I 4 Elementi”, publicau de *Edizioni Tracce Dicembre 2010*.

Su iscriidori at ligiu unu contu pentzau e scrittu de issu chi est “Il Carnevale degli gnomi” e at fatu chistionai is *personàgius de fantasy* imbentaus de issu etotu po imparai a is pipius una beridadi manna diàveras, ca sena sa famillia e s'amigàntzia non ci podit essi unu tempus benidori bellu e sanu.

In prus, s'iscriidori at domandau a ònnia classi una inditadura sua asuba su scioberu de is nòminis de cincu personàgius de unu libru nou

chi at a bessiri de imoi a pagu tempus e aundi at a torrai gràtzias a sa scola de bidda nostra po custu agiudu. S'atòbiu est istadu feti po is pipius de sa scola elementari de Baressa.

Novas Baressesas at a bessiri prus o mancu una borta a su mesi e s'at podi arriciri inderetura in domu, cun una e-mail: bastat a ddu pediri mandendi una punta de billetu eletrònicu a s'indiritzu serviziocultura@comune.baressa.or.it iscriendi su nòmini, su sangunau e “*bolu arriciri Novas baressesas*”.

In prus, s'at podi ligi puru in sa bacheca comunali o agatai in medas atividadis comercialis de sa bidda o in sa biblioteca comunali

Sa redatzioni de *Novas Baressesas* est contivigiada de su Servìtziu linguisticu sardu e de s'Assesorau a sa Cultura de su Comunu de Baressa.

S'isportellu linguisticu est a disponimentu de tzitadinus, maistus de iscola, professoris e istudentis po cali si siat informatzioni, fundamentu, duda, crosidadi, bibliografia, sitografia asuba de sa lingua sarda, po consulèntzias didàticas e po contzillus chi pertocant is arrègulas de iscidura de su sardu.

**Su Servìtziu est abertu po su mesi de
Friaxu:**

| | de | a |
|------------------|-----------|----------|
| Mèrcuris 01 | 8.00 | 15.00 |
| Mèrcuris 08 – 15 | 10.35 | 15.05 |
| Lunis 27 | 09.30 | 15.00 |
| Mèrcuris 29 | 11.35 | 15.05 |



Comunu de Baressa
Provintzia de Aristanis

Novas Baressesas

☎ 0783-930049 Fax 0783-930118
e-mail: info@comune.baressa.or.it

Newsletter periòdica de informatzioni istitutzionali de su Comunu de Baressa

**Responsabilidadi e proprietadi de su
Comunu de Baressa (or)**

Annu II, n. 1

Acabbau su 9 de Friaxu de su 2012

Po cornovali ònnia ischertzu ballit !

Novas de su Comunu

Cornovali in Baressa

Comenti a s'annu passau, ocannu puru s'**Amministratzioni** impari a sa **biblioteca** comunali ant apariciu po is festas de Cornovali calincuna atividadi pruscatotu po pipius e piciocheddus.

Mèrcuris 15 de friaxu faci'oras de is **cuatru e mesu de meri (ore 16.30)** in sa biblioteca comunali s'at a fai unu laboratoriu cun is piciocheddus intra de is tres a is trex'annus (fra i 3 e i 13 anni). C'at a essi s'iscrittori de fantasy **Alessandro Cadelano** chi at a a ligi unu contu iscritu de cussu etotu (e chi no at essi su pròpiu chi at ammostau me in scola) e apustis is piciocheddus ant a fai cun

issu is personàgius, ddus ant a disinniai e dd'ant ponni su colori puru.

Po **lunis 20 de friaxu**, sèmpiri faci'oras de is **cuatru e mesu de meri (ore 16.30)**, in sa biblioteca, at a s'ghiri su laboratoriu inghitzau su mèrcuris. S'ant a podi arregolli a domu is traballus fatus e apustis, gràtzias a su cumbidu de s'aministratzioni comunali, s'at a fai una festa de Cornovali puru, cun tzìpulas e cosas de bufai, musica po baddai e ispàssiu mannu po totus.



Torrat a aberri s'Ufitziu lìngua sarda

Est cun praxeri mannu chi s'aministratzioni comunali de Baressa si fait sciri ca a incumentzai de su 1 de friàrgiu 2012 est torrau a partiri, fintzas a su 30 de Donniasantu, s' isportellu linguisticu comunali. Custu at a permiti de valoritzai sa lìngua sarda cun s'iscopu de torrai a manigiai sa lìngua de minoria in sa Publica Aministratzioni puru. S'istitutzioni de s'Isportellu e is fainas cosa sua funt prevedidas de sa Lei 482/99 asuba su bilinguismu.

Aintru de is atividadis chi s'ant a fai me is mesis chi ant a benni, custas ant a essi cussas de importu prus mannu:

- Valorizatzioni de sa lìngua sarda pruschetotu cun su manigiu de sa lìngua de minoria in sa publica aministratzioni e in is ufitzius comunalis (cun sa bortadura in sardu de is documentus aministrativus, cun su chistionai su sardu me is ufitzius intra de is dipendentis e cun sa genti puru);
- Fai connosci is possibilidadi chi is leis de tutela de is minorias linguisticas donant;
- Donai consulèntzia po calisiat duda o crosidadi po su chi pertocat sa lìngua e sa cultura sarda a chini dd'at a domandai.

Po calisiat necessidadi chi arreguardat custas fainas chi eus nau innantis, totus is Baressesus ant a podi domandai a s'operatori de su sportellu linguisticu comunali chi c'at a essi me is diis e cun is oràrius chi si agatant in custu "Novas Baressesas" etotu.

Su Sindigu

Piergiorgio Corona

S'assessori a sa Cultura

Claudio Perseu